



partii naleraq

UKA 2015/107-01

04.11.2015

Soraarnerussutisiallit pissakinnerit nammineq inigisaminniittut illuminnut 100.000 kr.-it angullugit aserfallatsaaliinissanut pisariaqartunut tigusaqarnissaannik periarfissinneqarnissaannut Naalakkersuisut upernaakkut 2016-imi ataatsimiinnissamut inatsisissamik saqqummiinissaannik Inatsisartut aalajangiiffigisassaattut siunnersuut.

(inatsisartunut ilaasortaq Ane Hansen, Inuit Ataqatigiit)

Inatsisartunut ilaasortap Ane Hansen-ip soraarnerussutisiallit pissakinnerit nammineq inigisaminniittut illuminnut 100.000 kr.-it angullugit aserfallatsaaliinissanut pisariaqartunut tigusaqarnissaannik periarfissinneqarnissaannut Naalakkersuisut upernaakkut 2016-imi ataatsimiinnissamut inatsisissamik saqqummiinissaannik Inatsisartut aalajangiiffigisassaattut siunnersuuta Partii Naleqqamiit imannak oqaaseqarfigissuarput.

Siullermik inatsisartut upernaaq inatsisartuni ataatsimiinnitsinni utoqqaat ilaanniit saaffigineqarnerput tunngavigalugut ineqarnermut tunngasut pillugit oqaaseqarnitsinni ilaatigut imaattumik oqaaseqarnerput eqqaasitsissutigeqqaarusupparput:

Ilumoorsinnaanngilarmi utoqqaq 80-nik ukiulik inuiaqatigiinnilu sulilluareersimasoq, ataatsimik sinittarfilimmik ukiorpassuarni iluarsaanneqarsimanngitsumik najungalik, qaammammut 8.801, kr-nik utoqqalinersiutinik tigusartagalik ineqarnermut ukiumut akiliutigisartagaasa naatsorsornerat qivieraanni, imaattoq:

Ineqarnermut akiliut	19.764,-
Erniat piginnittumut	4.764,-
A/S INI-p ingerlatsineranut	4.852,-
Kiassarnermut	16,320,-
Imermut	1.225,-

BPS-imut	144,99
Innaallagissamut	4.620,-

Katillugit: 51.689 ineqarnermut akiliuteqartarpoq. Kialluunniit naatsorsorsinnaavaa qaammatip sinneranut inuuniutissat qanoq ikitsigisut.

Illua-tungaatigulli tusaamavarput inuit ilaat, ineqarnermut tapiiffigineqarnissaminnut pisariaqartitsinngitsut inuuniarnikkullu ajornartorsiuteqanngitsut, inissialiortiternermut pisortaniit aningaasanik ukiuni 20-ini erniaqanngitsunik akilersungassaannngitsunillu tapiiffigineqarlutik inissialiortiteriarlutik ineerannguanik ilinniartunut allanullu qaammammut 10.000,- kr-it pallillugit akilersuisitsisut, ineqarnermut tapiissut (boligsikring) iluqutsiullugu.

Ilumut pissutsit taamaalersimappata inatsisiliornikkut iluarsisassat piaartumik iluarsineqarnissaat tamaviaaruttariaqarparput. Ilumorsinnaanngilarmi inuit pissakinnerit inigisaanniik aniatinnianguarlugillu, inuit pissallit ineqarnermullu tapiiffigineqarnissamik pisariaqartitsinngitsut, nammineerlutillu ikiliisinnaalluartut inissialiornermut tapiiffigineqartassappata.

Partii Naleqqamiit isumaqarpungut inuit pissakinnerit inuuniarnikkut ikiorserniarlugit aammalu ineqarnermut tapiissutit aaqqissuuteqqinneqartariaqartut, tapiissutit inunnut pissakinnerusunut pisariqartitsisunullu tutsinneqartalernissaat anguniarlugu.

Upernaaq ataatsimiinnermi siunnersuutivut uteqqillugit matumuuna siunnersuutigeqqipparput: ineqarnermut akiliutiniit akiligassaq ineqarnermut akiliummut ilanngullugu kiassarnermut akiliut tapiissuteqarfigineqartassasoq, tassa ineqarneq, kiassarnermut ineqarnermut tapiissummut (boligsikring-imut) ilanngullugu tapiissutigineqartalissasoq.

Tassami § 37-ikkut apeqquteqarnitsinni kingullermi Naalakkersuisut akissutaat kingulleq 28. Oktober 2015-imeersumi imannak akipput:

“A/S Inissiaatileqatigiiffik INI paasissutissiivoq 2014-imi attartukkani 139-ini attartortunik anisitsisoqarsimasoq. 2015-imi 31. August 2015 tikillugu, suliasanit 907-init politiinut ingerlateqqinneqartunit, attartukkani 163-ini anisitsisoqarsimavoq. Tassunga sanilliukkaanni 2014-imi suliasat 860-it politiinut ingerlateqqinneqarsimallutik. Anisitsinerit amerlanerpaartaat ineqarnermut akiliuteqartannginnermik pissuteqarput”.

Tassuuna aamma uppersaqqinneqarpoq; naatsorsueqqissaartarfiup kisitsisit paasissutissaatai assortorneqarsinnaanngilluinnartut, tassa kalaallini inuiaqatigiinni aningaasarsiat ataatsimut katinneranni inuit pissakinnerit ukiumut 50.000 kr-iniit 200.000 kr-it ataallugit akissarsiaqartut 62,4 %-usut.

Taamaattumik inuit ilaqutariillu inigisaminnut akiliisinnaassuseqanngitsut amerliartupiloornerat killilersimaarneqassappat, ineqarnermut tapiissutaasartut nalilersorluarneqarnissaat aaqqissuuteqqinneqarnissaallu avaqqunneqarsinnaanngitsaq Partii Naleqqamiit piumasaaqaatingaarput.

Aamma siunnersuuteqartoq taperserparput utoqqaat namminerisaminnik illuutillit, sapinngisamik nammineq najungarisami sivisunerpaamiitinneqarnissaat naalakkersuinikkut siunniunneqartoq piviusunngortinneqassappat, maannakkumut periarfissaareertut saniatigut illumik aserfallatsaaliinermut iluarsartuussinermullu tapiiffigineqarnissamut pitsaanerusunik periarfissinneqartariaqartut.

Tassami nalunngisaqarpugut utoqqarnik nammineq illoqartunik, kisianni aamma rør-inik qerisoornerit, kiassaatinik ajutoornerit allallu illumi taarsersungassat iluarsaatassallu pissutigalugu tapiiffigineqarnissamik pisariaqartitsillutik ajornartorsiuteqartunik.

Isumaqarpugullu maannakkut aningaasaliissutaareersut iluini tamakku pisinnaalluurtut, tassami ineqarnermut tapiissutit inunnut pissaqarnerusunut ineqarnermullu tapiiffigineqarnissamut pisariaqartitsinngitsunut tapiissutigineqartartut, inunnut pisariaqartitsisunut iluartinneqarnerisigut tamakku landskarsimut annernanngitsumik iluarsineqarsinnaasut isumaqarput.

Taama oqaaseqarluta siunnersuutip aappassanneerneqannginnerani ataatsimiititaliami susassaartumi suliarineqarnissaa inassutingaarput.